

本傳

梁雲龍，字會可，號霖雨，梁陳人。家貧篤學。領嘉靖甲子鄉薦。萬曆癸未進士。授兵部武庫司主事。戊子典試貴州。所取多名士。兵部尙書鄭洛。經畧臨洮。雲龍贊畫建言。絕甘涼假道。以扼川海之吭。果奏奇捷。晉副使。治兵井陘。旋調天津。天津故京師咽喉。倭侵朝鮮。勢甚猖獗。有增兵設邊防之議。雲龍持議。以爲宜。勅將帥固守。罷敵臺陷阱諸費。所省數十萬。進參政。治兵開原。巨寇繁顛。受成功。著紀錄。調隴右分守。倭兵莊浪。會土營魯氏橫恣不法。奪其營務。途中蜚語。以參政聽調。遵例候代。尙從大司馬經畧兩河松山之役。恢復允吾一帶故地七百餘里。無何解任抵家。以叙前後邊功。復原任。進荊南布政使。以征苗功。荷褒獎晉一品俸。嘉通楚藩變起。就陞湖廣巡撫。擊盡楚事。親藩潞王。等五人有罪。擬置大辟。志時論難之。上從其議。牛遂竟於獄。丙午卒於官。贈兵部左侍郎。賜祭葬。祀鄉賢。阮通子思泰。下別有傳。嘉通

御祭雲龍公文

維

萬歷三十四年皇帝使行人司行人白竹。諭祭巡撫湖廣等處地方。提督軍務兼理糧餉按察院右副使都御史贈兵部侍郎。梁雲龍曰。惟爾偉畧宏深。淵謀遠慮。筮官武庫。簡贊戎行。東鄙西陲。屹峙長城之倚。南倭北虜。並崇京觀之封。埽庭績著乎松山。犄角勞深於苗播。乃膺任齊越。鎮撫楚中。捍衛賴以無虞。調停每聞殫力。倏然盡瘁。良用悲傷。嗟英氣之長垂。猶高風之不泯。特頒祭壘。庶慰重泉。

梁 中 丞 遺 稿

目 錄

書

晉水戰書與帶川書

碑文

蕩空松山碑文

行狀

海忠介公行狀

詩

塞上曲七首

附梁必強遺稿

記

目 錄

梁 中 丞 遺 稿

目 錄

二

瓊州府儒學正樂碑記

贈吳省齋先生築薦序

詩

層巒聳翠二首

青草孝貽祠堂和張子翼韵

背水戰書與帶川書

帶川賢姪。尙憶吾所由相率習背水戰乎。自昔衛序無歲廢。而從學切劘者。則自允棟先生始。是時匪值原沙先生少不與。吾且蒙亦未與云。嘉靖辛亥。唐學究訓蒙后山。吾業當志學年。始後習作文學篇法。五月吾父捐館去。遂廢之而樵牧。日從牧童馳騁原野。獵沙馬。生摘論功。羣童讓吾英雄。驅入馬戶園。侵榔蔗。治園使者。不勝其憤。負戈迫逐。飛刀作砍狀。幾及。且許曰。再來當殺。其期年壬子。敬所憲孔肇陵先生。偕陳龍溪氏並入學。而肇陵先生則首辟。吾鄉欽衣冠。但見錯彩聯翩。人競奮謀。奉陳襟江先生部置文事。諸學文翁館穀家不獲。過邀吾三叔翁。適觀吾樵影負薪回。衆嘲曰。後生能學乎。吾笑而不答。願吾母若兄。鼓於人言。趨之學。理篋中。僅父貽三部論孟尙書義經。從作文藝。逐日隨抄隨讀。襟江先生課文。吾腹空空。僅作口頭語。而襟江先生極奇。其明年予往梁陳從黃石溪先生。講周易。吾仍從襟江先生遊。多孟浪。母若兄懼。激曰。家貧讀不得書。歸治田。

母勞苦吾爲。吾始泣然悲。幡然省。此時自黃先生所歸。則時就談不厭。登羽翰牛肘腋間。思勤學習。其明年予途邀與重器。先生元相子四人。往學於梁陳石溪先生。日輪值俱飯。其明年乙卯。原沙先生總角試。補邑博弟子。而肇陵先生應試舉。於是吾三人始矢盟習爲。背水戰矣。攜茅舍於東蓬園中。閉戶不出。鑿壁進餐。吾儕視昔卷稍益。亦手錄。說海史林理窟諸書。惟予資遲鈍。小穎悟。無領畧。有時愛懶習慵。未能刻苦。一夜夢中忽見一人若吾父。舉臉一打。覺尙痛有掌痕。語神驚我。自是憤讀。及至夜分。或竟徹夜。一聚首共讀。亦至夜分。元相子林伯高二人從旁聽焉。如此者兩年。聞覺塵先生門下徒衆師資廣。於是與敬所重器先生元相子操鉛觚。遠百里而從先生者七十餘人。陳龍溪亦在列。以文名顯。而二三梁氏。獨韻頗稱雄。一出街。孺童輩指曰其梁云云。願是歲猶無一舉茂才。而吾僅辟入學。蓋丁巳年十一月也。其明年戊午。龍溪子薦於鄉。肇發都里文運。吾儕氣益雄。神益鼓。而重器君元相子則治農矣。獨原沙與敬所同吾三人。出一白

鷄當天地神明刑而歆血曰。諸所不同心者。有如此盟。塞園舍以居。治背水戰益力。時陳仁卿亦與盟。而從業則有楊彥昇梁晦之諸子焉。其明年吾復同原沙先生偕邀肇陵先生質正於鄭寧溪先生。先生久領文宗。從遊悉四方英雋。晚得三梁大喜。聲稱藉藉出諸高賢上。其明年吾三人並應舉。入副卷。其後二年癸亥。吾始至子始補郡邑博學。肇陵原沙二先生居制。吾以甲子秋歌鹿鳴。躋賓薦以游京師。卽舉子思孚於孟冬十月。氣溢閭矣。其後三年。隆慶改元丁卯。元輔子偕晦之彥昇伯高諸子並入學。而予與肇陵原沙三先生並應舉。獨原沙先生步武而聯捷。萬曆改元癸酉。思履子與憲武先生。又並入學。子思孚亦已總角掛藍。與原沙先生掛藍年同。並應壬午鄉試。吾始成進士云。自壬子迄今。歷三朝。越三十餘年。數其間聚散離合。未易枚舉。率以背水戰力。勤苦成功。願吾苦。分耳。吾苦猶有一日之逸。父母爲吾苦以沒世。而不沾一日之養也。子有父代子以耕。吾無父而有兄代吾以耕。田不滿十畝。吾父柝櫛澆覆且燕不治。歲不得半飽。吾兄束髮

當家。力耕作。歲收始支六七閏月。值荒歉日。不舉二殍飽。母僅啜糜粥一碗。而吾治書。獨二殍脫粟飯。無欠乏米哺。得收新穀。且携入市。博魚鹽以助吾勤讀。入市見人於酒粉行。醉且飽。而吾獨忍饑至頭暈眼昏。不勝步力矯健以行。先是刺竹華結實。里之人採其實釀酒治荒。吾母亦採而釀飲吾。抱梯登樹。至半梯脫仆于地。幾絕。半日始甦。當學於梁陳時。四家輪值供飯。吾當值。無人送。有一乳婢子。年少怯路。吾母則欸欸溫誘。護至學門。坐於田。俟其人而出。偕與來歸。已學於東蓬園中。去學稍近。往來里巷見無忌。吾母則日手搗以供。時於園門與吾母值。則相勞苦。母曰勞苦爲子。曰能慰勞否。吾母曰。卽不就做社師。說書足給無慮也。豈意吾父早逝。不覩吾成。吾母僅觀吾舉。而竟以丙寅六月長逝。視吾鄉舉時。僅一期十月耳。吾且既舉卽計偕應乙丑會試。至七月始歸。與吾母居。僅十月耳。十月之間。多是酬應世情。竟未暇與吾母談寒溫如昔。何曾治杯羹。奉吾母。正坐而饗也。吾父卒未十五年。吾母亦卒。若父母於吾爲厲行而長我思我。中

心無日忘我。丙寅吾母寢疾苦染痢。危篤日甚。強坐談今昔之苦。欲去。執手泣曰。十數年食苦相依。忍言別。吾憶此痛甚苦。吾父病將終。適遇吾有事上城。偶得正絹。謀歸遺治。讎歸則已蓋棺一日矣。若母卒。又弗邀惠。而遭逢寇擾。亂離世界。更無絮語致情。於是乎爲父母者含志長往不追矣。爲子者悲生風木。如自贖何。安在其起九泉之骨而靈肉之。而衣冠之。惟是行立名成。顯揚不朽。亦庶幾矣。於所生平無忝。卜正公。卜正婆。仙逝雖久。而都人士啓口輒稱梁沙有梁封君太夫人者。非原沙先生顯哉。此吾所以家庭居。恒戒論思。李子曰。吾既不能負米千里。以供父母。更復碌碌而靡所樹立顯榮。吾死則當東而葬。吾母之墓之傍。顯治吾不孝罪逆。此語非徒聳聽。實田愁衷。固欲自激亦激子也。其詮次以達之子。子閱之。則前數十年背水戰。豈不髮立肉奮乎。安得謂而不據鞍跨馬也。

公萬曆三十四年卒於湖廣巡撫任

蕩空松山碑文

松山在甘肅涼州府平番縣

碑文

八

大明萬曆二十六年秋九月。大司馬田公再計於制府李公。犁墻松麓既空矣。公又會諸文武經畫邊垣。辱食扒抄七晝夜。從容間及松山所以致虜。與今日所以蕩空。雲龍爲對壯頗悉命志之。夫松山之虜。豈六國初然哉。慶歷間始也。蕭山爲漢武所開。以斷匈奴右臂。唐因而稍傾封守。宋失而淪入夷。迨我二祖逐虜開疆。始克復時。雖地廣人稀。未暇垣禦。然而胡虜既逐之於三受降城外。則河套賀蘭。皆無不王庭。松山蓋耕牧沃區也。成化初火篩虜套。雖或不無西訌。然或間歲一至。或秋高一至。松山亦非金甌也。惟隆慶之末。五單于解辯。自上谷雲中。以至榆翔。皆稱藩。謂河西同一邊鎮。安可無市。於是招致賓酋。攜弟着力兒宰僧子阿赤兒額勒革麻記。西移松山而作之巢穴。開大小市於寧衛莊涼。又成一西河套。此松虜之所由起也。夫松虜既歇市。而護儲胥。則歇之可矣。而又奚必於空之也。蓋松山左擁蘭靖。右護涼古。前逼莊浪。兩河則腹心。甘鎮則咽喉。安能容得一虜山以西。扒抄

梁 中 丞 遺 稿

爲涼古屯也。山以東蘆塘爲靖虜膏地。山以南隆峇石灰。以至紅井。皆莊浪屯牧墳地。安可棄以虜。即使羣酋歸順。胡越一家。猶將疑其異類。況陽順陰逆。東市西剽。毋論誇有蘆沙既近境屯寨三層。墩台被其侵軼。一切棄之。而縮築邊牆。僅通一綫。且別鎮之。市夷外我內。大防固未決裂。今糾而東。東虜到我內地。建剝聚羶於青永火真。連爲三窟。而莊浪昌都之南北。悉爲市場。掠漢搶番。爲其耕種。其耳目。其爪牙。陵夷至於犯涇河。陷方朔。孰非松山貽之厲。又安可以市自愚也。夫松虜信當逐。而向來談款決戰。見謂難於登天。何以空之若承蜩也。蓋松虜所羽翼。青永所憑依。山險所哮雄番族。誰不畏其爲負嵎之虎。乃公則自壬辰夏。持節度渡河。周覽西塞。視之如釜魚穴鼠。第芟刈驅除。自有次第。以故蒐乘簡卒。不二年得勝兵一萬。公曰。可橫行匈奴中矣。一試於昌湖。而青酋破。再試於湟海。而永酋破。屢試於南北稀去。而零酋破。折首無慮二千。狡醜且聚挾寇鈔。公與李公計曰。若醜易與耳。只用河西兵。由泗水。由黃羊。由莊浪。亦足剪

覆。但恐其西潰東奔。必須會合。河東由蘭。由靖。由中衛。分路協剿。鴛淚風聲。始可一鼓而殲。於是我方約日會兵。彼乃悉銳先犯。抗莊兵於隆客孤頭。直欲逆顏行也者。忽被公出一奇兵。從洄水間道搗扒沙。又出一奇兵。從黃羊間道搗魚溝。攻其復背。遂潰敗奔遁。馘斬千餘。俘獲萬餘。則三月廿日也。勢既奔敗。晝夜驚疑。匪直番僧柴隆等歸之如流。卽虜酋着什吉等。亦投之若赴。旋即以此歸附。番夷還擾之。益不寧。而且乘雨挖邊。欲由鎮忿入海。又被公密檄大帥。伏殲其領兵五酋首。則七月三日也。彼始知西海不能飛渡。山東不能久居。着宰脫山後賓房屏息流沙矣。公猶曰。戎心叵測。能無潛螫毒。復於九月二十四日。躬率諸道兵。徧歷扒沙魚溝。窮其腥窟。選遣驍騎追擊之。淪大漠。馘俘葛爾晚卜等八百有奇。而松山始信無一虜。誰不服公之神勇也。夫松山犁空。旣復漢唐之舊。而有欲築塞聚兵沙漠中脫守禦。一不利。將無貽後以艱乎。噫嘻。此非多事也。虜旣戀棧。又復深憤。逐之去而不及爲提防。惜旦夕之力則旋逐旋回。螫毒必甚。惟是盧塘扒

梁 中 丞 遣 稿

沙。設將屯兵。而又修垣列障。將豐泉沃地。一概括之於內。而邊以外。悉是鹵磧沙漢。虜卽數十騎不能來。來不能牧。牧不能久。何況衆多。且西起泗水。東抵靖河。橫亘不過三百四十五里。其邊易築。自今冬以至明夏。虜馬方弱。其工易興。邊旣袤不長。其險易守。蕩空松山。必如是而周斯結矣。漢霍嫫姚。戲胭脂祁連。而匈奴歌曰。奪我胭脂山。使我婦女無顏色。奪我祁連山。使我畜牧不蕃息者。安知今不復歌耶。唐張仁愿乘虜跨河外築三受降城。而匈奴一望見卽哭者。安知今不復哭也。是役也。於莊浪無梗咽之虞。於涼古靖蘭無剝膚之患。於寧夏無疥癬之疾。於安會關隴無震鄰之恐。於我軍民大收屯牧之利。於彼河套無復糾合之蓄。而首議定策者。田公樂道。運籌制勝者。李公叔。協力矢猷者。陝西撫院賈公待問。飭度勅憲者。甘陝按院許公聞造。唐公一鳴。震耀威武。圖維大定。以善後而克厥成日。新任甘肅撫院徐公三畏矣。是皆天生元老。以爲社稷。而公與徐李二公。又皆北直任兵。則奇之奇矣。雲龍因率官若民勒之石。而銘曰。赫赫我祖。近

掃虜庭。來賓通道。受降築城。踏破賀蘭。拱護神京。盡茲松虜。冥頑不靈。乘市西徙。蜂聚實多。掠番自雄。虎視誰何。交結海虜。曰尋矛戈。抄及五郡。毒徧兩河。上千帝怒。肅行天討。三月會師。六路協掃。用正用奇。虛批抗擣。草雉禽獮。勢如振槁。號聲震谷。殺氣橫霄。威驚地圻。誰謂天驕。胡爲瞋眦。尙爾咆哮。七月乘雨。欲渡海壖。忽被伏擊。始遁沙灘。戎心叵測。懸機復還。乃乘秋杪。大出搜山。犁空腥窟。修築邊垣。西起泗水。東徂河岸。四百餘里。爲陵爲漢。漢唐故疆。屹然天嶺。且屯且守。匈奴臂斷。以若奇勳。問誰定計。田公造謀。李公持議。賈公矢宣。徐公保乂。許唐二公。持斧策勵。後先露布。懽動九重。諸臣口嗜。天子之功。天子曰俞。諸臣之庸。君臣未有。歸之太空。功在山河。何以稱空。松故無虜。原是真空。遂盡松虜。適返元空。安攘掀揭。浮雲過空。斂卻寂若。是謂太空。

右碑文乃緣塘支之元公隨姐兄探花張瀚山督學陝甘於到涼州時公披覽該州府志得霖雨公恢復松山之作并塞上曲七首錄稿携歸茲於咸豐十一年重修譜牒并付之剞劂以垂不朽

海忠介公行狀

嗚呼。公正氣直節。獨行敢言。業已簡在帝心。昭於國史。卽愚夫稚子。俱能道之。安所事狀。願有隱衷微行。足以師世範俗。而或出於士人所不盡睹記者。不佞謹。忝在戚末。事左右最久。親炙最真。寧獨忍不擲管詳之。而令泯沒爲公諱瑞。字汝賢。其上市以來未詳。在國初以軍功世廣州衛指揮某者。隸籍番禺令。爲番禺人。洪武十六年。答兒從軍海南。著姓於瓊。遂爲瓊山人。不再傳而族氏蕃衍。明經紛起。有諱寬者。以經行聞。領鄉薦。知閩中縣事。卽公大父也。寬從子澄。登成化十一年進士。爲御史。又有諱擱。諱鵬。諱邁。皆舉於鄉。俱名賢。有諱瀚係廩生。瀚卽公父也。以公貴贈承德郎尙寶司丞。加贈中憲大夫南通政司右通政。母謝氏封太安人。加封太恭人。贈公齊敏豪岩。不治生產。公甫四齡。而贈公捐館。太恭人年方二十有八。矢志勵節。日夜與公偕寢處。口授孝經學庸諸書。長就外傳。爲訪擇嚴明師

梁 中 丞 遺 稿

託之。其真一不渝。似柏舟。而慈訓學真。則有斷杼和丸之風。故公嘗自謂勉自修飾。若非中年肯父者。母氏之力爲多。然公立志之堅。任道之勇。則故其天性然也。公生而秀異。拔風神迥異。稍知識。直欲學做聖賢。而紛紛世態。皆無當於心。以聖賢教人。千言萬語。只是欲人識其真心。率其真而明日張膽。終身行之。卓然不羣於俗者。聖賢也。殊其真而餒其浩然之氣。不免與俗相爲浮沉者。鄉原也。非聖賢也。今天下惟鄉原之教。人人最深。世俗羣然稱僻性。稱太過者。多由由行之士。而所稱賢士大夫善處世者。或不免鄉原之爲鄉原。去大奸惡不甚遠。今人不爲大惡。必爲鄉原。而孟子功不在禹下。當以惡鄉原爲第一。公蓋隱括叔季人情物態。盡於鄉原一言。故其平生所學。惟務誠其心。爲聖賢不爲鄉原。力破夫無害從俗之說。獵較受賜之說。仕不爲道爲貧之說。以爲此皆聖賢傳有爲而言。今紛紛爲俗夫庸人藉口。豈不大謬。居恒著嚴厲教戒。召神立陸子下誨之曰。瑤平、女知女之托形於天地間者乎。天付完飾。女須完之。毋宮室妻妾動心。

母恂恂易操。毋財帛世界。而中流不砥。毋對人語雄。而地影媿衰。母質
 累囊參狐貉。而有蠲心恥心。毋疚中而氣餒。毋矜能而譚醫。毋自許窮天地
 亘古今而不顧者。而終或不然。有一於此。不如遺死。公執此以往。終身諱
 之。自謂聖人復起不能易也。然猶見時之人。紛然舉俗說以進。懼夫纖節少
 狗。竟亦天地不肖子。於是復撰客位。告辭與同志者。共砥淬。而自號曰
 剛峯。以代簞飯云。乃若居室之間。人所忽易。公獨謂於此不謹。性命之理。
 卽爲之壅闕而不流。君子造端之道。謂何以故。位內位外。荆家肅然。一切
 男女僕役。至老死不踰園閤。相往來處。伯仲嫺嫺。恂恂怡怡。而坐立跪拜。
 則惟禮是嫺。有從子鵬與公年相埒。同鉛槧。同寢食起居。又同上春官。然
 言必名。事必寡。毋敢幾微嫺狎。司徒郎二溪楊公。於鄉爲先達。年最長。而
 於公之門爲姪婿。相見間。公纔弱冠。必持叔丈禮。不以長故。貴故。稍假。
 在那庠時。獨與一二同志。辨學明古。卽郡博士嚴敬。不敢開僞遺常例。瑣
 人士稱爲道學先生。相率師事。公惕然爲作訓說以誥之。曰。今之學者。決

梁 中 丞 遺 稿

狀元進士於科第。人恆壯之。此學奚自而來。聖賢以識真誨人。其設備在方冊。惟潛心玩味。而踴躍於詠詠。時舉仲由之不恥綈袍。孟子藐大人。伯夷之敢於非望。服之心胸。往來不置。或者充養有機耳。其程文藝。則曰。文不過如畫師之寫神者耳。窮一生讀書作文。而於國家身心。毫無補益。何異宋人所謂可惜一生。心用在五字上者乎。故公之用心。匪特恥爲聲詩。卽古今文詞。要以開發性靈而止。雖不稟古則。而自成一家。大率如其人云。嘉靖二十五年。丙午。督學林公始刮目公文。已廬其行誼。大加獎賞。適有所出婦許訟公。且誣裝資。林公詰問。以出妻令其可嫁爲對。至所誣裝俱不辨。惟稱貸倍償而已。林公益重之。已酉督學蔡公繼至。試題有不曰白乎之句。手公卷珍翫移時。因詢知公微隱事。嘆曰。茲所謂涅而不緇者非耶。是歲公舉廣東鄉試。甫應癸丑一科會試不第。而當四十強仕。即毅然自決曰。士君子由科目奮跡。皆得行志。奚必制科。遂就教。而瓊方平剿黎岐。安戢未定。公始舉於鄉。所答平黎策問。嘗有開道立縣之議。得者已才公經

濟。至是伏闕上書。復申前說。其略曰。瓊之黎自宏治十四年。迄嘉靖二十年。二十九年。凡三大舉矣。臣嘗以爲宏治間。開道立縣。可無嘉靖間兩次大征。即今大征後。開道立縣。可無歲歲雕勦。年年守戍。聞者避之。已下兵部議。覆獻圖說計便宜。燦若指掌。而議竟寢已。授南平學教諭。始至申諭曰。教官非塾師比。職欽承明命。請以嚴師自處。諸弟子有一日之雅。當以從令自盡。乃首揭朱子白鹿洞五規。輔漢卿會粹六事。並摘鄉原忠信廉潔之似。孟子不見諸侯之守。孔子申棖剛者之辨。反覆啓迪。以發其真心。作其浩氣。毋論諸生講讀。升散必宿號舍。卽其家冠婚諸事。亦稟請循禮而行。毋論行檢大節所係。乃兢惕。卽減年微細。亦曰卽此已陷於不誠不一之地。更學何事。相見拜揖外。不許更持一貨物。進而參謁禮儀。斷斷執會典。絕綱。力以其身爲標幟。明倫堂。不跪。道旁不跪。迎送郭門不出。上官至一見後。不復同有司作三日揖。郡守諸大夫。視學升堂。教官謁左右跪。公居中挺立。諸大夫色艱。語侵曰。安所得山字筆架來。蓋指公也。公志在行道。

而一入官。區區禮節不見諒。謂此闕陷世界。何能有濟。遂告休。郡丞某
 悲公。甚欲聽去。太守某獨媿悔曰。彼所執。竟是吾誤也。時大司空朱鎮山
 公爲閩學憲聞之。取赴正學書院修書。公力求去。鎮山公慰留曰。平生所學
 謂何。所出謂何。只爭一跪耶。公乃留。接院至。延率諸生候郭門。有分守道
 某先進。見公長揖不跪。而誰之。侍者以海教官對。隨令侍者物色。公接
 接院作何狀。已接院進。公禮如前。分守道聞之。吐舌曰。今世有若教官耶。
 夫會典憲綱故事皆廢格。而獨創舉於公。雖若不無駭近。而理有同。然則固
 更相曠服。謂當於古人中求焉。用是抗顏於南平四餘年。所如一日。而守相
 臺察以上。咸鑒涵之矣。閩中苦驛傳。不命有司。而獨檄公酌議。公謂驛遞
 之疲。千瘡百孔。盡由近年關文冒濫所致。今當一切裁其不合法例者。而復
 國初五馬三驢之法。此爲上策。乃若因驛級崇卑。以爲應付多寡。而借關
 不行。中策也。禁止迎送勞擾。而就中稍爲調停節減。以求諧俗。下策也。蓋
 中策下策。公已謂非國初之舊。然皆救時急務。故特舉之。以爲閩計。明裁

樂 中 丞 遺 稿

革必可行乎。而公之由縣令以至巡撫。則固從上策矣。戊午春擢知淳安縣事。一履境。睹痛苦萬狀。詢所以。嘆曰。天下事都被秀才官做壞了。豈直不才。食殘剝。充囊橐。即賢者亦鄉原。正道交戰胸中。窮竭膏脂。博交延譽。乃輒歸咎朝廷征賦。煩不可爲。何也。征賦卽煩。各有定額。去什一未遠。而額外無名。可省不省。朝廷爲之。抑諸臣爲之耶。於是申飭所行事宜。而先爲明其意。若曰。知縣。知一縣事也。上而朝廷。吾父母。中而撫按藩臬僚屬。使客卿士夫。吾長兄弟。下而吏書里老百姓人等。吾子姓。遇之各有正道。若謂止可潔己。不可潔人。潔人生謗。謂凡所行。不可認真。認真生怨取禍。不顧朝廷之背否。而以鄉原之道待其身。以鄉原之道待吾子姓。吾長兄弟。淫沉取名。竊取官爵。非知縣也。而丞。而尉。而師儒。而里老。而生員。而吏胥。爲各申飭。謂自吏胥而上。誰不身任民物之責。與有民社之寄。獨奈何自營私爲也。卽其所宜。著爲潔令。名曰淳安政事。蓋自信其粹乎聖賢。中正之道。我祖宗頒行畫一之制。相與執守之。其自奉也。俸薪外絲毫

不侵。雖家僮亦令樵採。庭甚清閒。吏書無事。亦聽其從農從商。里甲故用銀。每丁至四五兩。公曰。徵二錢有奇。百凡用度。取足於是。至上官檄縣取金餽。境內士夫舊多委曲應之。公惟於其贖鍰內理焉。有則送。無則已。撫按出例。陰遺其吏書。謂無此則禍且至。公獨曰。充軍死罪寧甘受。安可爲此穿窬舉動耶。津要知厚有餽問。外官入京有交際。謂要做官。不得不如是。公獨曰。盡天下而不爲上官之路也。豈盡不遷。又盡天下而惟上官之路也。豈盡不調。安可自以其身甘溝壑也。淳故多淫祠。社學獨缺。公毀祠宇以爲社學。欲盡如洪武六年令乃止。而作興士子以道義。不以勢利。間有援例。上粟必論之。歸於正焉。維時都御史鄆氏挾權相。總制八省。鏖政。威焰赫甚。其子過淳安索夫馬不與。怒捉輿臺。非理凌虐。甚至倒而懸之。公不顧。密執鄆關防詐僞中所云。申文得鄆批。悉捕按如法。先是鄆惡令巡歷所至。務爲節省。而其實不然。大率有司皆窮極淫靡以事之。動費千百。計程只一日。當至嚴。嚴守相戒盛爲供具以待。公獨上稟貼

曰。傳聞所至。與憲牌異。欲從憲牌。則懼招尤。欲從傳聞。則恐違憲。下邑疲敝。未知所從。鄆匿言曰。照憲牌行。然遷道去不過嚴矣。嚴守聞鄆且至而中止疑之。已知公具稟之故。慮禍且不測。盛怒。待公入見。輒踞坐擊案曰。幾大官敢爾。罵不停口。公惟斂容長跪無一語辨。氣稍平起揖而退。亦無後言。迨鄆事竣。嚴諸官故無害。太守見謝曰。好了。淳安百姓難爲汝。難爲汝。然鄆雖媿屈公。而陰嫉其私人。袁巡鹺曰。不驅海強項。何以持風憲體乎。袁既受顧使。而按淳又見公迎送不遠。供應不隆。有所鈎付不唯唯應。諄曰。汝即欲學府官樣還未還未。已而公給由申呈駁云。方呈給由。已爲陞任之狀不准考竟論。然公無事可指摘。尋有通判嘉興之命。又以袁論之故。仍以原職改調。公聽調赴部。朱鎮山公貳銓曹矣。隆冬盛寒。公見猶羸絲且敝。朱公曰。即貧不能製一官服耶。公始一易黃石絹。朱公爲言公清望於冢宰嚴公。而其鄰邑興國適缺令。遂改公補之。公抵任。察地瘠民貧。歲徵不滿什之伍。弊在浮糧。乃條八事。上南贛都御史吳堯山公。次第諸

行。而獨急清丈。清丈甫畢。而報陞戶部雲南司主事。蓋鎮山公力也。公將赴部。太恭人怯北寒思歸。亟不得已。發玉恭人攜二男三女扶持以歸。而輕身挾二僕北上。既視事日。見肅皇帝晚年立修。大小臣工。率勉強道服將事。乃慷慨上言。天下第一事。以正君道。以明臣職。蓋爲身家心。與懼心合。臣職所以不明。求長生。心與惑心合。君道所以不正。故以堯舜禹湯文武之治責君。欲洗數十年君道之誤。以皐夔稷契之輔責臣。欲洗數十年阿君之恥。其間批鱗逆耳。侃侃數千餘言。自許於有犯無隱之義。國史蓋詳載之。公是疏出。一日而直聲震天下。上自九重。下及薄海內外。無不知有所謂海主事也者。疏始入。即訪同鄉庶吉士王先生於玉堂公署。相見間自分必死。首以後事爲託。詢其所由。袖中出奏草一通。人方危公。而公且談笑自若。至所遺後事。惟白金二十兩。曰死於爾乎。殯還我首邱足矣。已而對酒論文。談古今治亂興衰之故甚悉。至語及士大夫立身行己。惟以事認眞。集議養氣爲主。餘而曰。今之醫國者。只一味甘草。處世者只兩字鄉原。

古治之盛。何由而見。語畢。從容赴朝房席稿待罪。鼎鑊自甘。絕無幾微可憐之色。王先生者。即今宮詹忠銘公。故嘗爲予言之。嗟夫死生之際亦太矣。而公就義從容若此。豈市直沽名微倖於一試者哉。疏入爲乙丑冬十二月。逾年丙寅數月不下。時有厥人在公左右偵食息。暨所如往。而公則終日子。然無所顧畏。上方憤懣。一日忽下公詔獄論死。中外相顧失色。而會銜實何公爲司務時。上疏力救公。亦幾死。然竊聞公疏入時。上創覽怒甚。抵其章於地。已復取置御案。日再三讀爲感動太息。稱有比干之忠。又密諭輔臣在華亭集中云。他說的都是理。但言過激爾。遽加刑戮。恐後無此人。然則肅皇帝曷嘗有死公之心哉。讞獄雖上而竟留中。意亦以淵矣。臘月。僊皇。肅皇上賓。莊皇踐祚。首奉遺詔。出公於獄。復原職尋改兵部武庫司主事。丁卯改元晉丞尙寶。四月丞大理右七月轉左。適有波羅之役。奉使回省。公遂令甲行出使禮。三司諸公率以釋官忽之。而公自處甚峻。學憲羅公沈相齟齬。至以私郤沮太恭人旌節事。公亦不爲之屈。十一月陞南京右通

政。復迎太恭人就養。而王恭人始偕來。己巳春正月改通政司右通政。提督
膳黃。六月陞右僉都御史。奉敕總督糧儲巡撫應天。撫故與按並彈壓一方。
欲有規畫。必衡隄後行。公則謂撫按各有專責。不得越俎相侵。乃獨以昔所
爲教南平者。令淳安者。令興國者。稍加潤色。擴充爲督撫憲約意。蓋主
於斥黜貪墨。搏擊豪強。矯革浮淫。釐正宿弊。令旣布嚴乎烈日秋霜。風物
頓易。郡邑吏凜凜競飭。若非往日人。昧者。則望風解印綬去。權豪勢宦。斂
手屏息。至移他省避之。有顯者緒其門第以居。聞公明日將至。一夜遂易而
黝。監造中貴某素驕橫侈縱。出入肩輿八人。騶從甚都。一見公卽內媿貶
損。不能自安。所用肩輿人。遂減其半。吳故有淞江匯震澤入海。瀕江田畝。
灌漑宏多。已被潮齧淤爲陸。議浚者多迄無就。民有謠。惟是海龍王始開得
耳。至是公議開。實應民謠。而按院某者先是惡公壓已。每事不與之商議。
乃於此舉故爲相左。且欲按劍尋其後。公不顧。毅然獨以身任之。措處公
義。召募丁。作乘輕舸往來江上督舂鐸。不旬月報竣。計費甚省。且役成而

民不知勞。按院某驚訝。竊嘆曰。萬世功被他成了。至今姑蘇民無不德之。獨以公在任不久。未及大究其施爲憾焉。江以南貧富相傾弱者。率投獻田地。豪家以爲奸利。而此離瘠苦之狀接於目。侵占爭奪之訟案於庭。公氣勃勃下令。受獻者悉退還。或許贖。即恩厚如華亭相公家。亦義勸其退田不已。蓋公嘗論欲天下太平。惟有井田一法。井田之卒。壞而不復。惟有亟奪富民田一言。至於不得已而限田。又不得已而均稅。下下策矣。然猶井田遺意。故其兩制疲邑。皆用清丈。茲又令獻贖還贖。意亦仁哉。顧勢豪沿襲。腹誹唇稽。竟以奪富民田中公。而舒戴給事章交至辭無事。專督南京糧儲。方巡撫候代而糧儲裁革。實以計去公也。公以庚午四月回籍。閉門卻掃爲終焉計。自始仕至此十八年。所祿入僅買居第一區。值一百二十金。祖田十畝外無益。惟萬歷乙亥治太恭人喪事。兵憲陳公助贖金。始斥置墓田數畝耳。居恒稱不給。而交際所入。輒周戚里貧乏。未嘗自私。邦大夫戈戟相屬諮民瘼問行政得失。必纚纚爲正言之。恥面諛。亦罔及其私。曾有吏

書算田畝。陰爲公減一畝八分。公清出不謂其厚己。必鳴而正之。山水諸癖一無好。而惟喜讀書。其所著述如秦伯等論。多破除俗謬。而猶喜引進後學。家居十餘年。日爲課藝文說經義。或餒困時。以手撐腹言無倦厭。即相送出門。猶立談移晷也。平生大有用世志。嘗讀嚴子陵傳。至積足帝腹事。嘆曰。吾人一身徭萬物之理。則當以萬物一體爲己任。士君子出處何常。視所遇何如耳。有君如此。安忍負之乎。歸未幾。而薦者踵至。都諫擁涇坡等。會薦有忠貫日月。望重華夷之語。而吏部具覆奉上命。遇有員缺。相應酌量起用。逾年萬歷改元癸酉。今上命遇有南京清散員缺。推補時。蓋籍籍望公起矣。嗣是御史若詹。若龔。若梅。若王。都御史若郭。給事若王。各具疏薦。而最後甲申十二月鄧按院純吾上疏特薦上曰。海瑞既屢經薦舉。查有相應員缺。即便起用。不逾月推通政司左通政。上又曰。再查相應員缺起他。年逾乙酉正月起僉南臺都御史未至。以爲南吏部右侍郎。舉朝縉紳無不羨主上特達之知。而海內聞公起。亦誰不舉手加額。獨惜其起稍遲暮。蓋

公是時年已七十有二矣。公以二月聞命。卽東裝就道。或勸公盡姑辭諾。公則謂主上有特達之知。臣子不可無特達之報。區區虛襲奚取焉。遂啓行。自瓊臺至瓊岡。家僕皆徒步。有一小僮。亦祇攜附前輿。不與焉。又自五羊至上新。惟坐小船寂寂過。多無知者。五月履任。蒙宰邱月林公未到。公署部事。見兵馬司票取坊上人辦公牘百物。又見該坊送各衙門取應票共三百餘紙。嘆曰。夫以五城之人。當一京千百官。出入用度之擾。誠難而苦矣。吏部既長六曹。安可不念先百姓。遂張示禁革故辦事官更。有輸銀公費。并新任有賀禮。一切革除。嘗思念古今主聖臣良。千載一時。而吏治民風。猶如先日。因疏乞骸骨。併陳一日治安要機。謂欲安百姓先守令。欲督守令先司道。欲督司道先撫按。而致望於閣部諸大臣。歸本於君身。治安之要。誠無易此。願獨憤食殘滿載。論劾不止者。蓋起於改枉法。職八十貫絞律。而從難犯。准徒許贖。非重刑決不能懲。以故援霍文敏請復枉法律疏。而因及國初尙有剝皮囊草。特以明其言必可信。而觀者不察。遂謂欲復剝皮

令焉。且歷舉今政以資難於君曰。願皇上以茅茨土階之心。居九重金闕。持智者行所無事之術。御一日萬幾。見堯舜毋見天子。意真語切。而近於懇。即帝心亦且難之。蓋疏上爲甲申二月。而是時則又有南京右都御史命矣。公用世極銳。上用公亦極銳。浹歲三遷。咸屬睿眷。自此疏一出。惡信參焉。而梅房御史。遂憑藉雌黃。房則大肆譏擊。公質不勝房。惟是彭君遵古。諸君嚮賢。願君允成。三進士。上疏申救。乃足以袂發奸邪。而保全忠直耳。公於時雖拜命履都御史任。而歸志已決。屢疏乞骸骨。第國是未濟。主眷未衰。火甲夫差。方題議未定。時且大計故遲遲焉。大計苦於愛憎叢煩。是非難一。公獨與冢宰李公。秉公持正。毋縱毋苛。衆咸服之。至於火甲止爲地方防守。原無雜差。今則一京千百。其官率於茲焉。取用雖節。題革亦竟廢。公乃一正之於官民界限。使官不侵民。民不病官。總之爲簡可照煩一冊。使上以稽下。下以應上。畱都民若弛重負。出湯火矣。而公意猶以未盡如京師爲歉云。比夫議既定。歸志益決。貽不佞書曰。七十有四。非做官時節。况

天下事。只如此而已。不去何爲。龍復曰。此兩語足以決去就矣。蓋六乞骸骨不得允。竟以丁亥冬之十月十有四日卒於畱都。愾哉。卒之前三日。兵部送柴薪多耗七錢猶扣回。病不藥。臨危男僕猶不入內。無一語及身後事。獨抱真純以還。檢篋內僅祿金一十餘兩。綾紬葛各一。徵都御史王公麟泉。率諸御史捐金治具。何以歸乎。子姓兄弟既無一在側。雖有二廛四僕。又愚弱不任。而更衣沐浴含歛。悉都御史王公。左右襄治。則諸御史。噫嘻。公何以得此於諸公哉。南京諸縉紳見公卒。相顧悼曰。天不佑善。俾正人氣奪。百姓奔相告。扶服悲號。若喪慈母。十一月六日訃至。無論識不識。更相悼曰。安得復見若人。上聞爲之咨嗟。纏惻。申命秩宗考典禮。祭八壇。水衡致金錢充窀穸。遣行人許君子偉往治葬。太宰議贈官加太子少保。太史易名諡忠介。蓋上之篤念直臣恩厚如是哉。公生於正德八年癸酉十二月念之七日。享年七十有四。配王氏封安人。繼封恭人。前娶許氏生二女。因大故出。側室二。邱氏。韓氏。子男二。長中砥。次中亮。皆王恭人出。一十

一歲。二九歲。以公在獄時殤逝。晚又生一子中期。邱側室出。三歲而殤。從弟珣有仲子中適。倫序應繼。公雖未立。而起官時屬以家。則繼者。必此子也。女三。長適蓮塘張筠。次適林知縣子林岳。皆許出。二適郡學生周維誠。王恭人出。嗚呼。公之出處生死。其關於國家氣運。吾不敢知。其學士大夫之愛憎疑信。吾亦不敢知。第以公之微而家食燕私。顯而莅官立朝。質諸其所著嚴師教誡。一一契券。無毫釐假。孔子所謂強哉矯。而孟子所謂丈夫乎。古今一眞男子也。論者概以性甘淡薄。有採薇之風。天挺忠貞。有扣馬之節。謂道似伯夷信矣。然其視斯民由己饑寒。恥其君不爲堯舜。言動必則古昔稱先王。蒞官必守祖宗成憲。挫折不磨。鼎鑊不避。即伊尹奚讓。望之如泰山壁立。就之如春風太和。接談無疾言。無遽色。臨難無鬱氣。無忿容。筆楚子弟撻臧獲。亦不見其厲色嚴聲。卽柳下惠奚加。特其質多由於天植。學未進於時中。任事不無或過。而隘與不恭。蓋亦有焉。嗟夫。公所殤咸口碑尸祝。所幸皆爭道塞途瞻望之。處畱都時。有不識姓名。遠方老者

梁 中 丞 遺 稿

求供帚除。一月二月。去又有相率求貌公像以去。學士大夫。亦有焚香事公。每事必卜。如羅浮葉桐齋者。而不佞祇居門下。既弗克護公歸。又弗克嚴事公。謂之何哉。公始至畱都。遺誠曰。吾嘗憐賢親不砥柱中流。落入俗套。三復斯言。凜若嚴師教誡在上矣。用是拭淚引述。深自鍼砭耳。乃若所以不朽公。闡幽而勸天下於明者。則以俟夫立言君子。巡撫湖廣等處地方、贊理軍務、都察院右副都御史、兼兵部右侍郎、同邑門下生梁雲龍泣狀。

梁 中 丞 遺 稿

狀

三

梁 中 丞 遺 稿

塞上曲七首

其一

東風吹柳漢營青。上相臨戎列將星。誓滅匈奴清絕塞。暮南無復有王庭。

其二

胡馬頻年下青海。漢兵此日開營壘。聖主無意啓邊疆。直蕩妖氛殿千載。

其三

黃石陰府白狐變。天山傳定無三箭。尙須射殺左賢王。露布飛聞未央殿。

其四

西塞旄頭破賊年。關山月色照旂連。秦爭唱徹胡笳絕。別是陽和一樣天。

其五

征夫弓箭補腰間。萬馬嘶嘶大號頒。一曲南薰雲外奏。吹殘殺氣滿天山。

詩

其六

莫謂秦關腥未掃。漫云漢市圖不早。壯猷但得周方叔。邊郊到處生芳草。

其七

涅河誰挽洗胡弓。麟閣爭圖第一功。西極夜來瞻正氣。乘槎直泛斗牛中。

梁必強字原沙瓊山梁沙人夙負清才偶儻不羣磊落自異萬歷甲戌進士任晉江知縣政簡刑清愛士恤民縣試拔取蔡夢說第一決其必中已而果然淡於仕途滿任歸休設館造士成就後進蔚起多才中年以後怡情山水每遇名勝流連登眺題詩磨崖至老不倦著有滄浪集

附梁必強遺稿

梁必強字原沙瓊山梁沙人夙負清才倜儻不群磊落自異萬歷甲戌進士任晉江知縣政簡刑清愛士恤民縣試拔取蔡夢說第一決其必中已而果然淡於仕途滿任歸休設館造士成就後進蔚起多才中年以後怡情山水每遇名勝流連登眺題詩磨崖至老不倦著有滄浪集

梁 中 丞 遺 稿

瓊州府儒學正樂碑記

天地間孰非一氣之流行哉。秩叙斯。斯之謂禮。節宣斯。斯之謂樂。其端著於品彙萬化。其用演於物則民彝。其發揚宣暢。則始於天子之郊廟。夫子之宮牆。渾渾乎一氣之流行耳。古昔聖神。咸熙時叙。以擊以拊。而究極於神人相。百獸率舞。蓋自有神其機。而協於極者。豈真人物有不能知。卽堯舜后夔。亦與化俱忘。故曰聖人在上。而鳳凰儀。志壹之動氣也。不然。氣應灰飛。何取於葭莩之杪。而聖神之制作。亦粗迹已耶。我太祖高皇帝。荆定九奏樂章。念君師並重。旋隆文廟儀節。自郊畿而達之荒甸。自宮牆禮教之地。而推之里巷閭閻。家禮樂而戶絃歌。甚盛心也。今聖天子在上。調攝元氣。浹洽宮闈。宣邇百物。先成民而致力於神。勒之太常。播之郊社者。肅然融然。溥海內外。罔靡熙洽。卽海濱鄒魯如瓊島者。聲教亦暨訖。而一時幹旋氣化。人事有如宗師鳳坡易公樂育士類。興禮作樂。端士習以正人心。如莪斯

菁。如茅斯聚。乃郡伯任台周公。貳郡望峯董公。司理懷松黃公。力能承奉
摠管。一切廟宇祭器。概夫課士章程。煥然維新。犁然整飭。而董公督責料
理居多。咸能體協宗師至意。故憫廟樂殘廢。或無以妥聖靈而極風化。因於
均田救荒之後。陽谷回春。乃命生員游廷春。樂正吳琪等。授之音律節奏。
舛者正之。訛者訂之。缺者補之。且曰生等所習者聲耳。審耳。非所以器也。聲
也。其尙和吾之氣。以孕聖神之氣。而因以鼓動民物。節宣天地之氣。如夫
字語魯太師者乎。予曰望之。美哉洋洋乎。大國之風。不必起后夔於往疇。
而截雌雄於嶠谷也。則當聞鄒魯兩生之言曰。禮樂積德百年而後興。殆不
知有所以發端者。有所以漸漬者。謂成於百年則可。謂興於百年非也。諸子
必無兩生之固矣。且樂正於柔而濟之和。師曠歌南風。而昔人以爲得中聲。
瓊固南方風氣。柔勝爲強者。由柔而歸之和。特一運旋力耳。矧名公鉅儒。
振揚於上。諸生輩殫竭心力。奉行惟謹於下。愚輒每與廟祭。耳目其聲容度
數。宛若見聖賢於在位。而沐盛世之全音也。漸漬之厚。風移俗易。安知百

年之久。無師曠其人。歌中聲。協中氣。而馴致於和神人。舞百獸之盛哉。易公諱可久宜春人。周公諱希賢莆田人。董公諱志毅贛榆人。黃公諱履初晉江人。敬書之以爲記。

贈吳省齋先生榮薦序

世之論功名者有二端。翰卿墨客。持平具。星術讖緯。談乎遇。惟通方鉅儒能一之。曰遇非具無以乘。具非遇無以顯。則窮年兀立。何所藉以自表見之。二者相待而成。缺一罔濟。顧遇定乎冥冥茫茫。雖孟賁烏獲之力。難以挽回。可自盡者具焉耳。今人重科第。欣欣喜得。咄咄嗟失。或不遇所懷。僅以策名歲薦。則未免蔑視身有。而卓犖倜儻之氣。亦竟以是索。吁亦未明乎具遇正合之理。即吾持吾具以出。果能不貢平生。則吾職盡。吾心安。雖公孤師保。所得自立者。無越此矣。吾又何歉。偷自卑自貶。舉吾平生之筐箚田廬。一一計焉。雖公孤師保。巍巍燦燦。且庶人不如。而況吾乎。此吾省齋吳先生之所素自明。余固知之稔者。先生少負俊聰。早馳文譽。負性復耿介。不作流俗萎靡態。練達世故。如治生之道。齊家之禮。卓卓可傳。且增墓祭。復學田諸善舉。即古君子所爲。原不相讓。持此具而効之。科甲可也。歲

梁 中 丞 遺 稿

薦可也。即賢隱亦可也。而遇不滿具無論已。今夫金爲劍則割。爲鏡則照。爲戈戟則擊刺。使人以之爲戈戟而止矣。則亦所遇適然。將因是而指金曰。彼其質僅能戈戟也。不能爲劍而鏡也。天下其誰是之。則信乎遇不足以盡人。而遇之當安久矣。況當今之歲薦。遇又難於往昔。蓋自隆慶登極初年。慎重厥選。時則御史龐公設議。每貢正副必四。而拔取其一。以故考選愈精。得貢愈難。與科第等埒矣。值茲難而獲茲遇若吳君。吾固知其不以易視之也。夫桃李易於發榮。然春去而華者瘁矣。樹有喬樗。寸積尺累。不知經何許春秋。方高尋丈。然竟壽於諸木。易故促。難故久。豈獨一桃李喬樗爲然哉。於仕亦然。吳君果能不視之以易。上而藩臬別駕邑尹。次而簿丞。無論崇卑。統安吾遇。行吾具。以盡吾所爲之分。卽不遊太學。僅爲博士。能以所讀古書。教二三子。忠孝大節。奮業匡時。固不必自爲之。卽我貽之也。何歎耶。而遇寧足計耶。不然。以遇不足計。而自審其才。是忘其得之難。而具遇正合之理。胥失之矣。非余所望於吳先生之深意也。敢以是勉之。

屑齋簪翠二首

公與門生都察院蔡夢說遊萬州東山嶺鋪錦石上偶題此詩二首又題四字於山頂云東山簪翠

半捧峻嶒半水涯。逶迤駐節疊山西。乘空虎嶺支來遠。聚翠龍池眼欲迷。回首三天三島近。縱觀五指五雲低。人鍾地氣清高萃。奚獨文章入品題。

恰似巫山二六旂。迤延州里萬峯餘。前屏拖紫文爭煥。後嶂垂青秀更奇。石室可容多客坐。仙巖應與衆朋期。他年着屐重來此。半買山錢半酒卮。

青草孝貽祠堂和張子翼韻

棟宇千尋壯里居。如何祠下草長除。爐烟鼻鼻靈如在。水木悠悠意自舒。種德一心無望報。傳家萬卷有藏書。知君對此無他羨。只羨吾生樂有餘。

耳外無聞車馬音。白雲長護宇垣深。心田遠接槐三葉。手澤長存桂一林。課子才名齊北斗。承家禮敬重南金。照入古道今猶在。喚醒人間鳥哺心。